

տեսակ հողեր՝ հայրենի, պարզեւական եւ սակագին: Սրանց յարաբերութիւնը անմիջական տէրերի կարող էր միակերպ չլինել: Երկրի վեհապետի դիրքը եւս սրանց հանդէպ մութ է:

Չի կարելի անդամ վստահել որ նախարարական հողերը բոլորն էլ ազատ լինէին պետական ծանրութիւնից: Դուրինի ժողովի կանոններից մէկը յայտարարում է որ եկեղեցականները «ընդ ազատաց տոհմին են կարգեալ», որ եկեղեցու հողն ու ջուրը ազատ է, եւ երէցներին տները «ի դիւանին եղեալ են, բայց միայն գիտան տալ յարժունիս»: Ասել է թէ ազատ հողը պարտաւոր էր որոշ հաս տալ պետական դանձարանին:

Այս ակամայ խոստովանութիւնը կարեւոր է: Եկեղեցին արտացոլում է նախարարական միջավայրի կարգերը եւ իր ազատութիւնը նախարարականի պատճէն է: Իրաւունք ունինք կասկածելու, որ նախարարական հողերին եւս անձանօթ չէ եղել արքունական հասի վճարումը:

Այս պարագան նոր լոյս է փռում դեհականների հարկահանութեան վերայ: Ոչ թէ Սասանեան բիւրոկրատիան էր նրանց յանձնել հարկերի դանձումը, այլ հին իրաւունք էր, որ պահել էին փառքի վերջալոյսին գէթ գիւղական նեղ շրջանում:

Այս նշանակում է, որ պետական դանձարանը ստանալիք ունէր նաեւ նախարարական գիւղերից: Ուրիշ խօսքով բիւզանդական կոլոնների նման նախարարական գիւղացիք վճարելու էին canon հողատիրոջ եւ որոշ հաս կամ հողահարկ պետութեան:

Եթէ միայն ճիշդ է այս ենթադրութիւնը, կարելի է ասել պատրաստ է այն դուռը, որ տանում է կոլոնատից դէպի սերվաթ, միայն թէ միւս պայմանները ներեն:

Այս պայմանների մէջ է ամենից առաջ հողի եւ բնակչութեան յարաբերական չափը: Գիւղացու շրթալուծումը հողին հետեւանք է այն երեւոյթի, որ աշխատող, մշակող ձեռքերն աւելի քիչ են եղել քան հողը, աւելի թանգ: Անընդհատ պատերազմների եւ այլ աղէտների պատճառով Բիւզանդիայում բնակչութիւնը նստացել էր եւ բաւական չէր լայնածիր տարածութիւնները մշակելու համար: Հողատէ-

րերի եւ պետութեան շահերը համերաշխաբար պահանջում էին չթողնել հետանալ միանգամ ձեռք բերած աշխատող ոյժերը, ուրեմն, գիւղացուն մեխել հողին եւ զրկել նրան տեղաշարժի եւ անձնական ազատութեան իրաւունքից: Սրանով ստեղծուած է կոլոնի համար այն դրութիւնը, որ կոչուած է սերվաթ:

Հայաստանում պակաս չէին սով, սրածութիւն եւ անթիւ կոտորածներ: Սակայն, որքան նուազում է ժողովուրդը, աւելի մեծ չափով պակասում էր եւ հողատէր ազնուականութիւնը: Քաղաքական աղէտների առաջին զոհերը ազատներն էին:

Միւս կողմից երկրագործութեան պիտանի դաշտերը այնքան մեծ ծաւալ չունին, որ նրանց մշակման համար ձեռքերի սակաւութիւն զղացուէր: Հիմք կայ կարծելու, որ նախարարական կարգերի ծաղկման շրջանում միշտ հողն էր պակաս քան մարդը: Վրացերէն լեզուն ունի բոզանի բառը, որ նշանակում է հողագուրկ գիւղացի, նման ուսական bobil: Սա ուրիշ բան չէ եթէ ոչ հայերէն բոկանի, որ երբեմն ունեցել է այդ իմաստը եւ իր հետ տարել է եւ պահել վրաց լեզուում: Կարեւոր տերմին է թւում եւ ոչ սովորական բառ, եւ հին վկայ սակաւահողութեան:

Հողի եւ աշխատանքի համեմատական չափը նպաստաւոր պայման չէր, որ սերվաթը բողբոջէր Հայաստանում արեւմտեան Փէոդալականութեան յատուկ երանդներով:

Կարիք չկայ նկատելու, որ այս բոլորը բարդ հարցեր են, կարօտ հետաքննին ուսումնասիրութեան, եւ մեր անցողակի նկատողութիւնները չեն, որ պիտի բերեն սպասած լուսարանութիւնը:

Մեր նպատակն էր միայն քննութեան առնել պ. Մանանդեանի դիտողութիւնները շինականութեան մասին եւ քննեցինք լայն հասարակութեան առաջ, յուսալով որ կը գտնուին բանիբուն անձինք, որ չեն զլանալ դրի առնել հայ երկրագործական միջավայրը իր բոլոր կողմերով, սովորոյթներով եւ հասկացողութիւններով: Չէ թէ միայն մօտալուտ կորստից ազատած կը լինին ժողովրդական դանձերը, այլ եւ որոշ նպաստ կը բերեն անցեալի ուսումնասիրութեան: